





道遠長渴飢客子懷苦辛仰瞻天漢流夜永不得晨
驂馬媚其曹鳴鴈各求群明星出東方照見車上人
夙興即往道登彼高路津還顧望京邑愴然何所陳

宛宛春田鳩

宛宛春田鳩飛鳴柔且閑一朝化為鷹蕭蕭厲羽翰
衆禽不敢並孤立秋雲端鳥旣不自知人胡究其然

與客問答二首

門有萬里客頰面帶風霜左右佩鸞韞意氣何揚揚
問客何州士逝將之何方客亦不顧云但言開中堂
手持一書札口口稱故鄉長跪受書札草字八九行

上言親戚故下言別離傷

長跪牽客裾故鄉今何如客起長跪言故鄉不可居
墳隴旣蕪沒寧復識田廬隣巷鮮故人族屬半丘墟
巖巖高山谷今爲官路衢主人聆客言涕泗交漣如
離鄉三十載小女爲人姑邇者日以親遠者日以踈
狐狸知故穴牛馬知故陸願爲連理樹托根北山隅

贈徐禎卿

獨處忽不懌攬衣循東廂樹木何條條春風起飄揚
我友駕在門告言適江湘倉皇挈玉壺追送臨河陽
顧瞻兩飛鳧並戲水中央翩翩厲羽翼鳴聲一何長

奈何客遊子。一別永相望。時澤亮有周。天命固其常。
薄終義所劣。別離庸詎傷。懿彼回路贈。慷慨申此章。

申州贈何子

翩翩雙黃鵠。凌風各將去。哀鳴岐路側。一步一回顧。
何異同心子。失散在中路。別君倏五載。我髮忽已素。
今逢不須臾。趨駕一何遽。臨分但踟躕。道語不及故。
山川何悠悠。白日奄欲暮。努力愛玉體。慰我長思慕。

李廣

李廣昔未遇。射獵誰見稱。君王猶未識。他人寧不輕。
日從田間飲。夜止灞上亭。醉尉前呼呵。小吏亦見凌。

一朝剖郡符。飛蓋赴北平。凭軾覽百邑。樹羽寧千城。
亭障不設燧。櫪馬躍頓纓。彎弓射虎歸。澹澹黃雲生。
自從結髮戰。舍鎬無虛鳴。威懼五單于。胡人寤寐驚。
孰知身運乖。數竒竟無成。壯顏逐年衰。白髮忽見嬰。
寄言雄圖者。俟命莫吞聲。

余覽百門山水尚矣。頗有移家之志。交春氣熙
忻焉。獨往述情。遣抱四詠。遂成示同好數子。

魯連蹈東海。介子逃西山。方舟信超越。巖徑安可攀。
揚烈猶靡懲。置金徒嗟嘆。伊余秉拙訥。薄遊及茲年。
急湍有奔桴。迫路無停輶。慘慘滄流月。淒淒沙塞烟。

徒欽靜者意未遂同袍言偶耕慕龐公巖棲景焦先
捫秉諒有持顧已竟誰護復來感方寂解作憂更牽
抑心二十載始別金門還積痾謝人徒頗與踈遜便
眷茲丘園榮豈羨場苗篇

浮海傷固窮逾河嘆誠邁濯纓萬里流高視九州外
功成奔運徂氣至流飈代淒淒秋柯零冉冉春條媚
周覽倦河壖孤悰冀巖瀨道以沉寂超賞與崇深會
豈惟超遠情亦因謝塵籟聿想山中人風吹女蘿帶
折麻臨險岫采秀越森蒼眷彌志終申獨徃竟誰礙
崑崙太行峯毳毳百門對抗手別故懽乘雲弄烟瀝

關圖訪名竒久欽蘇門山危峯羅懸牖積石噴鳴泉
情吟激魏女嘉遯招古賢出遊結夢想神徃理誰詮
連巖旣鬱紆迴渚復綿芊猿吟曙霏豁鴈泊暝陰還
杖策躡丰茸解裾濯潺湲仰視遊雲翻俯察戲藻鮮
覽物慨幽存撫化懷冥筮况逢春華交更此眺孤烟
畢婚非達生一嘯復何言

山客戒明發朋來故攀留巖潭窈叵測險徑增離憂
曰余負幽僻誦古歆遠遊陟懷康樂屨浮羨鴟夷舟
探討傾子長浪迹多阮侯若人不可作瑤草竟何酬
事徃悲易深情存道難侔以此激孤諫喟然睇滄洲

安波有覆艦坦路無全軌危虞豈在嶮薄劣終見尤
願附綠蘿緣永與棲者儔

自大過渡河趨陂沙岡

凌春遠行邁游目恣泐越漸辨林中曙遽失霞上月
觸物誰爲情悲嘆曷可歇載登隋疆場况眺宋城闕
陽坡散初柳陰曲峙寒雪只此判氣候豈必殊燕粵
潏潏濁河駛粲粲晨風發揚帆截驚濤倚棹望窮髮
鳧鴈眇難即汀蘭翠堪結美人旣莫期天路復幽絕
陂岡鬱參錯岸沙皓明滅日暮孤雲興何以慰忡悒
陽武詠懷陳平張蒼遂及博浪之事

玉璽戒不力金鏡淪無光大人旣龍興烈夫亦鷹揚
伊人名乘時矯若孤雲翔韓椎豈在屢秦氣日已喪
六竒佐揮戈五運開靈昌時來屠沽奮跡徃英雄傷
平生冀風期况乃逾故疆灑淚越脩垆含凄遡河梁
古墳密嶢嶢春沙鬱茫茫徒瞻松柏路詎申椒蕙芳
道榮更何尤任智終自戕羨彼赤松遊援筆即此章

功德寺

宣宗昔行幸遊戲玉泉傍立宇表巖嶂開池芰荷香
波樓遙感沓風松奏笙簧百靈具來朝落日錦帆張
萬乘雷霆動千巖滅流光綺繡錯展輔翠旗沓低昂

法眷撞鍾鼓。宮女拭御牀。笙鏞沸兩序。星斗宿巖廊。
至尊奉太后。國事付三楊。六軍各晏眠。百官守舊章。
巡非瑤水遠。跡豈玉臺荒。嗚呼百年來。回首一慨傷。
鳳騰赤霄暮。龍歸竟茫茫。山風撼網戶。紫殿生夜霜。
退朝值休木。我行蹙翱翔。翔娟登岸林。慘慘度石梁。
廢道哀湍寫。松柏間成行。啓鑰肅歷覽。過位增悲涼。
積久灑掃缺。乳鴿鳴膳堂。舊時琉璃井。倒樹如人長。
神已佐上帝。教猶托空王。鈴磬颯鳴戛。晨昏禮相將。
盤遊非聖理。操縱在先皇。至今朝廷上。不改舊紀綱。
乙丑除夕追往憤五百字

憶昔黷賓初。皇疾輟臨仗。維日白氣亘。黑風復排踢。
俄傳天柱折。忽若慈母喪。帝本堯舜姿。末履轉清伉。
歛祗接耆碩。高出文景上。兩宮悅孝子。九廟歆流鬯。
毅然整六師。霹靂無前向。犬羊遁朔漠。鯨鯢蟄溟漲。
淵冲不凝壽。日表空殊相。蜿蜒湖中龍。一夕拔驚浪。
回首哭蒼梧。冤斷湘南瘴。念昨下明綸。臣也誠無狀。
誓死叫閭闔。伸頸甘礎益。梁竇勢如灼。漢庭色惆悵。
皇乃西園遊。召彼侍供張。從容杯酒間。似讓還非讓。
未剖青瑣封。已下金雞放。臣某豈足惜。體統關衰王。
歷數古明辟。聖節疇能尚。逝欲碎臣骨。顛帝不得廷。

攀髯眇莫及痛哭橋山葬玉光動前星朱符闡靈睨
主器難久虛勉起答群望金木歛爲崇太白晝相抗
羯胡敢余侮吾徒盡乘障嗚呼榆臺役棄我六千壯
跟踰戰士骨躡跋將軍輶二豎固輕率腐屍亦云當
所恨國威辱北鄙氣悽愴鉦鼓凝皇情何以慰宸况
悽悽建未月臨門遣征將紕綉作元戎京軍本浮蕩
翻使沿邊卒束手遭箠掠揭嶂雲中城誰復扼其吭
胡來風雨聲胡去橫拍唱千村與萬落人烟莽蕩蕩
嬰兒貫高槩志婦經衣衿狐狸叫破壘落日悄滄漭
此輩誠鼠竊反覆亦難量騏驥駕鹽車虛名縛骭蹇

世豈乏頗牧賤或執鞭杖瑣瑣登壇子飽之則飛颺
吁此良太枉國慨何由暢水旱而秋雷陰陽迭驕亢
皇天雖至公視之但塊塊臣當歷服始認進大夫行
退朝寔憤切欲吐畏官謗武王秉黃鉞師事太公望
列聖構梁棟駕馭亦英匠先帝升遐日臨榻召三相

湘妃怨

采蘭湘北汕○寒木澧南潯○淶水含瑤彩○微風托玉音○
雲起蒼梧夕○日落洞庭陰○不知篔簹竹○苦惟見淚班深○

春曲

綺閣俯通闌後有百尺樓並坐紫羅茵雙引青玉甌

楊花薄暮起粼粼。縈芳洲。

送友人入關

南山鬱幽幽。豐水白浩浩。鳥啼漢城樹。塵起咸陽道。
驄馬東方來。長鳴翻玉蹄。春風吹綠草。明月滿關西。
乘月玩清夜。漱流滌煩痾。竹栢夾傾水。微風揚澤荷。
苔陰皓露溽。素鱗躍于波。柔條紛歛結。勁葉亦隕和。
優游蕩情志。俯仰丘中阿。雖無朋儕和。興言自成歌。
娛樂當及時。千秋豈復多。

雜詩

馳輝在西山。返影流東隅。群欣被光灼。何能待須臾。
重陰肅萬物。樹木日夜踈。叢蘭植幽闥。含榮耀前除。
佳人眇雲端。何由致區區。常恐霜霰至。委棄不我需。

贈孟望之二首

遙遙京洛客。承命發華輶。朝辭冀州野。夕汎黃河流。
雙旟翔汝側。駟馬登故丘。故丘鬱以長。岡隴茂松楸。
車徒耀城郭。親戚迎道周。丈夫志四方。州閭寧久留。
王程在須臾。顧念但懷愁。前有盈觴酒。為我且綢繆。
驅車策良駟。北上遵太行。升高睇崇京。宮觀遙相望。
前瞻碣石湍。俯見東海疆。壯觀局宇內。高志何激昂。

孤鴻務南翥，奮翅起隨陽。黃鵠遊四海，胡為悲故鄉。
何能有羽翼，從子俱翱翔。

擬古三首

婉孌城東姝，懷春一何早。朝遊採桑陌，暮止垂楊道。
自矜全盛時，復恃顏色好。玉貌隨年化，安得不枯槁。
昔為園中英，今為路旁草。路旁多車馬，採掇難自保。
名都有高樓，上入青雲端。端脩城延曲，隅阿閣交重欄。
佳人理清曲，當戶橫朱絃。揚采丹霞裏，今顏誰不觀。
賓客會四座，絲竹哀且繁。日中車馬至，薄暮皆言還。
聽曲各言好，知音良獨難。誰為同心人，並起乘雙鸞。

圓如天上月光輝，尚當缺與君非。一身安能不乖別，
關山日悠遠，舉步難可越。君如雙車輪，妾心如車轍，
相隨萬里去，繞繞何時絕。

立春

藹藹春候至，天氣和且清。端居撫流化，允愜靜者情。
浮陽起叢壑，流烟散孤城。岸條發潛穎，園卉合初榮。
寫襟曠明霽，覽物紆遠行。目悅雙飛雉，耳感孤鳴鶯。
形運自相代，神理誰為名。往規與時逝，來慮隨年并。
心存漢陰灌，能不嬰世榮。

叢臺

邯鄲多俠士。趙地產名娼。日多高臺上。懽宴殊未央。黃金飾舞榭。白瑩綴歌梁。安見千秋後。空令春草長。

豔曲四首

御溝連上苑。大道接平沙。紫陌三千騎。青樓十萬家。城中楊柳樹。風起暮飛花。翩翩五陵兒。籍綺冠華簪。常懷雙寶劍。詎惜千黃金。馳馬章臺下。紅塵那可尋。蘭燈列滿座。繁炬灼朱光。富貴傾南國。佳人出北方。畫堂翡翠帳。夜夜鬱金香。高臺臨萬戶。朱構耀城隈。共藉鴛鴦綺。雙持鸚鵡杯。

春風樓下度。一夜百花開。

贈望之二首

嫋嫋孤生楊。迢迢水中汭。平生骨肉親。婉孌相諧悅。思心起懽燕。何況當乖別。浮萍寄清流。聚散有懽悒。與子同枝葉。胡為隱離闊。愧匪根與株。莫能相固結。德人重行義。志士輕訣絕。慎子萬里軀。慰我長飢渴。良時不克俱。悠悠子行邁。行邁之何方。乃在萬里外。汎舟涉江湘。道遠阻湍瀨。我心思桂林。倚立增嘆慨。河清豈無期。柰此日月逝。所願芳未歇。及茲采蘭蕙。七夕劉子緯宅次君卿韻。

良時屆今夕、懽覲諧茲方、流飈委芳卉、清池激微涼、
仰觀牛女星、熒熒河漢傍、纖月揚西隅、遊雲起中央、
合離一以愴、明晦古難量、繁子場下駒、慰我長思望、

飲酒

平生多意氣、四海盛交遊、列筵亘長夜、談辯雄名流、
杯酒一言合、遽將肝膽投入門、顧兒女、忸怩但懷羞、
齒年逮今茲、世故多所由、興言念親戚、骨肉嬰我憂、
寒宵寡懽悰、濁酤聊自謀、明燈耀室內、盤蔬代庖饒、
豈必朋與賓、妻子前勸酌、語笑率真性、無嫌亦何尤、
人生貴知足、吾志卑公侯、數觴已復醉、頽然萬情休、

寄言馳鷲子、從今任去留

集吳子寺館

首夏憇祇園、游息解冠簪、牕楹抗䟽敞、殿宇闕深沈、
綠竹帶陰渠、丹葩綴陽林、旣枉高人躅、亦協靜者心、
琴書散煩慮、鐘磬發幽音、清言忘朝晏、玄思超古今、

贈君采

蕭散綜琴書、疲疾謝回亂、清雲汎闌暑、白水激文瀾、
於心懷我友、翩翩振詞翰、比室諧言晤、撫景悅流翫、
孔公讚龍蠖、莊生明吹萬、理感由神詣、情賞非虛嘆、
鄙哉辯雌霓、安知睹河漢、願投忘形契、去適無窮岸、

詠懷

寂寂沅湘流，長江上有楓。青蕙綠廣隰，綠蘅被洲中。
揚舲泝煙津，遙瞻二妃宮。二妃何婉孌，舉馨振微風。
解珮遺下女，將以明我衷。光采不易合，精誠渺難通。
浮雲蔽江臯，白日忽已晚。還顧蒼梧原，何時翠華返。
東風吹我衣，白日何杲杲。整駕出郭門，脩塗浩潢潦。
登山采幽蘭，日暮不盈抱。采之欲何為，遺我平生好。
豈無艷陽花，言子好香草。丈夫有本性，安得不自保。
寸心苟弗移，可以鑒穹昊。

贈李獻吉

美之席上限韻送別二首

邊貢

惻惻重惻惻，當歌復成默。客駕雙車輪，欲挽不可得。
華燈粲宵焰，殷勤照行色。月轉庭榭光，風起簷樹黑。
誰能理朱絲，為鼓長相憶。
悠悠清川波，矯矯風林翼。翼翼飛邈難，止波去何時。
息憐君萬里行，莽莽天南北。懼紛有孤操，涉遠無近力。
不見寒松枝，歲晚青更直。

章氏園餞別升之分得木字

中園飛雨過，逍遙散遐矚。青雲陰華棖，迴焮散炎燠。
百卉何葳蕤，芳菲鮮如沐。駕言贈遠人，采采溝中綠。

明倫彙編 卷三
遲回未終極，陽景沉西陸。歸驥嘶長林，翔禽鳴高木。
感物多所思，寒裳以踟躅。踟躅不可留，何以慰衷曲。

別湯子二首

關途鬱迢遠，卉草青以發。驄馬何駟駟，向風鳴不歇。
廣隰流春霏，層岑翳圓月。遲回去不忍，引領望京闕。
京闕杳難覩，萋萋蒼樹林。沉沉天宇寂，藹藹浮雲陰。
丈夫萬里志，烈士千古心。鳳鳥久不鳴，誰哉繼其音。

答顧華玉見懷之作

離腸如車輪，萬轉不計程。咫尺阻言讌，何殊在山城。
閒曹事稽纂，文墨紛相縈。不見馬上人，空聞馬蹄聲。

攬衣步幽闈，脉脉牽遙情。屋上春鳩啼，樹杪浮雲行。
坐惜韶景暮，江臯芳杜生。

贈別右揆鄒公

懊惱復懊惱，鷄鳴一何早。病夫掩關卧，遊子就長道。
娟娟窓中月，照見窓下草。室邇人遂遐，懷憂坐堪老。

懷往

徐禎卿

昔我逢休景，結交共雲翔。秦客穆脩矩，魯生蔚令章。
同聲展言笑，四座發芬芳。北牖湛清酒，明月出西方。
廣署滅流塵，蘭燈揚朱光。極意連篇翰，良夜殊未央。
歡宴豐時豫，千秋焉可忘。流光一朝絕，撫膺增慨慷。

雜述

緬求先民迹體德異通玄自非孔聃志所造孰無譽
伊余實闇劣秉筭昧幾先言念恭人德惴惴戒重淵
徒隆守已樸罔達濟時權順正不尤物任道故樂天
務光以潔湛梅生智自全箕子狂爲奴何必屈父賢
未周群物情且復徇已偏人命幾何時金石忽以遷
永言保貞素庶明松栢堅眷念携手益用嗣北風篇

雨霽庭藥芬郁

炎曦代暮節溽暑布萋陰迎風抗高館疏牖匝重林
百卉熙嘉月洽土重豐霖中庭始及霽芳蕤忽以森

即事寡喧垢投足類幽深朝藝植余杖時還散我襟
處世常希寂委順故怡心何必東山下考槃始投簪
、酌贈方周二子

弱弄寄觚翰中歲慕沉玄浮華粲華圃精理密真詮
弘述允大道忘言亦自然常恐良時暮蘭苕豈久鮮
游情倦素藝委志蛻玄蟬流觀宇宙內尚友羲皇前
方生振文綺周子攬冥筌清論徵秋水溫藻發春泉
跂余慕二美荷子企前賢乃愜同棲志忽枉瓊華篇
氣感聲必合跡異理無愆永保日新願均期善自全

古意

空為郢中客。不見郢中吟。美人高堂上。自奏山水音。
帝子葬何處。瀟湘雲正深。寂寥誰共賞。江上獨勞心。

留別邊子

我車駕言邁。將子城之隅。豈無他人親。媿媿心自知。
握手一為嘆。忽忽從此辭。驅車何迢迢。迢迢復遲遲。
匪我車輪遲。行子有所思。登高望河水。河水何瀟瀟。
褰裳欲涉之。俛首以踟躕。孤楊生河干。嫋嫋何差差。
民生失儔匹。惻爾令心悲。

留別都城諸同志

對酒忽不樂。悵然懷別離。別離結中勞。眷彼長路岐。

萋萋郊河樹。曖曖關門祠。佇望瀟湘水。先與秋風期。
鴻鴈雲中來。嗷嗷令人悲。懷哉爾方集。悵矣予當辭。

學謝靈運賦華子岡詩贈趙建昌

朱巒鬱靈奧。雲海互盤旋。陰霞絢石室。夾篠媚清漣。
翠羽紛啁哳。瓊蕊合紛妍。桂嶺屯蒼靄。桃蹊迷紫烟。
朝登郡樓望。佳色鬱葱阡。挹景企嘉客。臨風懷羽仙。
冥賞非偶愜。神理豈虛傳。建德寡民務。山水發清絃。
順性奚矯迹。知道在忘筌。非君秉淵尚。茲理誰為宣。

江夏題王太守城南精舍

林步不覺遠。溪流隨興長。悠然深竹裏。獨往綠蘿莊。

山色佳南郭。平疇連北堂。野人來荷鋤。蠶月百草芳。
寤愜白雲賞。載謠叢桂章。垂楊足池鯉。閉牖有壺觴。
念此牽情性。何勞緇素裳。

黃陵懷古

何孟春

黃陵帶湘水。隔斷蒼梧丘。灑淚向脩竹。白雲生遠愁。
重華不復返。湘水日夜流。雙鴻矯玉羽。春草滿汀洲。

古別離

黃衷

惻惻復惻惻。送君遠行役。携手出潼關。何時渡沙磧。
沙磧路綿綿。胡塵晝暗天。莫辭頻勸酒。動是幾經年。
經年嗟馳騫。虜地無芳樹。野曠似連雲。深日如暮。

日暮氣轉寒。長驅襲可汗。壯夫多遠思。龍劍勿輕看。
送許給事啓表使交趾

熊倬

春明發車騎。合沓集川原。美人使絕域。相送東郭門。
君去豈徒然。能令中國尊。

擬古

顧璘

烈風吹西園。繁霜中夜落。彼美三春花。顏色盡銷鑠。
蟪蛄潛空野。潦水息大壑。鷹隼厲羽飛。商氣日以廓。
古人重交權。大義良不薄。臨命沉黃壚。永不負然諾。
野鳥多采章。檀園亦生擗。貴盛非云美。貧賤詎云惡。
瓶罌各有量。貴子善斟酌。

遊泰山二首

王守仁

曉登泰山道行行入煙霏
陽光散巖壑秋容澹相揮
雲梯掛青壁仰見蛛絲微
長風吹海色飄飄送天衣
峯頂動生樂青童兩相依
振衣將往從凌雲忽高飛
揮手若相待丹霞閃餘暉
九軀無健羽悵望未能歸
塵網苦羈縻富貴直露草
不如騎白鹿東遊入蓬島
朝登泰山望洪濤隔縹緲
陽輝出海雲來作天門曉
遙見碧霞君翩翩起圓嶠
玉女紫鸞笙雙吹入晴昊
舉首望不及下拜風浩浩
擲我玉虛篇讀之殊未了
傍有長眉翁一一能指道
從此煉金沙人間跡如掃

遊江心寺是宋帝行幸處

豐熙

榛檜被岳幽蕭寺臨滄流
宋皇法夏后泮渙昔曾游
階草承金輦岸松維藻舟
裁詩刻翠壁龍光滿淵丘
民誦吾王謬惠澤霑遠州
彤雲麗行在綵鳳翼宸旒
憑軒玩魚鳥命爵娛歌謳
嗤彼粵勾踐局促懷仇讐
卧薪不出戶何以銷百憂

渡桑乾

都穆

西風早蕭蕭催我玄鬢皤
祗役發皇邑川原屢經過
金龍池畔水演作桑乾河
東馳入滄海浩蕩成洪波
誰知稽天流發源始盈科
覽茲感幾事防微當若何

春日吟

孫一元

地偏無往來。空亭春正深。會此淑霽景。花木弄繁陰。
去去散芳躅。風來吹我襟。意得不能語。野鳥醉好音。
翛然遂忘倦。盡力還幽尋。纖纖孤月上。遲遲白日沉。
嗟哉林居子。還當期此心。

訪樵者

遠尋山中樵。不識山中路。隔林伐木聲。遙憶林深處。
不見竟空歸。日墮西陵樹。

徐孺子

刑人弄神器。漢道日將覆。群賢抗大義。機露身先戮。

矯矯南州士。雲卧匡山曲。高鴻眷青冥。潛虬媚幽獨。
竭來世可遺。力耕食自足。四海弔黃公。千里芻一束。
下榻走陳侯。身尊道不辱。緬邈有斯人。千古仰高躅。

石上小酌

康海

沿流歷層壑。攀蘿下迴磴。雖有芳草心。未憚遠遊興。
沆瀣愕中流。巖竦怛旋徑。酌酒坐石上。夕陽更輝映。
薄言呼兩生。音響動相應。始信空谷聲。果協靜者聽。
酒酣連袂歸。悠悠心靡定。

同用昭自華州南郭往西谿作

愛爾谿堂靜。驅車同遠尋。南郊更崎嶇。春涯多綠陰。

蒲荇漸將徧松竹已成林感慨宿昔意相對淨塵心
悠悠日西邁渚禽揚妙音即此興已極何必東山岑

既別華玉歸途有述

朱應登

憶昔筮仕日幸承清路塵解后欣有託晤笑長相親
已方曹劉駕更接王謝隣英聲激四海朗譽徹層旻
皎如當空月餘光迴照人一朝判別袂十載問迷津
君行叔梁苑余往入函秦過從再申叙愴別多苦辛
微才慚負荷直道生緇磷雉毛方易鍛龍性本難馴
天涯互遷斥異域俱沉淪巡方嵩外詔辨俗湘中神
遭迴萬里道坎壈百年身君旣獲量移余亦得再掄

風烟開赤縣湛露熠朱輪大噐有深受跼步無久伸
揭來謝明主歸卧安故貧松堂照衣劔竹逕滌冠巾
時飡元亮菊亦采季鷹尊窈窕漁樵夕拮据農圃晨
索居人事寡感子眷情親征軺辭象繡飛蓋歎荆榛
開顏置美酒列坐行細鱗相知兩相得一晤匝一旬
便言從此日可以卒千春我醉發狂言君意諒不嗔
皇皇宣尼父栖栖齊魯濱臨河嘆鳴犢反袂傷獲麟
豈云道難值所恨生不辰世事有翻覆吾性本清真
期君南山麓共訪采芝賓

妾薄命

王廷相

苑遊馳玉輦，風動聞鳴珂。長門咫尺地，春盡不曾過。
宛轉腸九迴，想像嘖雙蛾。誰言織女巧，夜夜隔銀河。

東海有一士

鄭善夫

東海有一士，被服雲錦裳。饑餐炎洲霞，渴吸瑤池漿。
鶴馭何翩翩，九垓一相羊。朝發閭閻野，夕憇沉默鄉。
睠言與汗漫，抗臂窮洪荒。九州雖云大，視之如室堂。
紛紛尺蠖徒，看彼鴻鵠翔。

初離京邑留別諸同志二首

陳車遵城闥，振策道廣路。仰眄孤雲征，俯見波流汭。
感念平生懽，豈以杯酒故。群居不自覺，相失增怨慕。

川河引舟楫，陵陸曠煙霧。重覲難可尋，努力敷襟素。
浮萍戀故波，離鳥思故林。故林既得期，儔侶無遺音。
與子共朝夕，奚堪更商參。山河日已邈，霜霰日已深。
鴻鱗無時至，安能訴幽襟。晤好亮有時，迅節忽再陰。
願言敦明德，白首慰離心。

贈用賓歸江郎

翩翩黃鵠飛，頤足珠樹林。誤入燕雀網，稻梁非夙心。
羽毛日摧頹，逝節已再陰。終焉摩青天，高梧結珎禽。
秋風下木葉，各奏世外音。凡鳥空嘈嘈，角鷹扇禍淫。
玄陰一解散，求友意何深。風翻或相及，無忘寄幽襟。

短歌行

跨馬出郭門。馬疾不俟鞭。長跼挽君馬。聽我歌一詞。
涼風戒芳樹。白露栖寒蟬。君子有所思。遠遊及幽燕。
在家人所愛。去家人所憐。朝餐不及餐。豈得戀膝前。
下有黃口兒。上有滄浪天。今時何清廉。盡室難遠遷。
但願被雲錦。麻屨無棄捐。獨行多辛苦。加飡以延年。
送道夫赴闕兼懷何仲默

胡羯且構患。我友之朔方。朔方萬餘里。金門鬱煌煌。
下有避世士。大隱而誕章。十年風塵深。寂寞中省郎。
食祿侏儒下。脩身意何長。我有薜荔裳。因子遠寄將。

一以存苦節。一以昭不忘。

、黃山雜詩

園廬春事至。歲事此伊始。采芳入層雲。散髮不及理。
蠶眠葉柘繁。土膏農務起。龍鬪未敢聞。巢父正洗耳。

方茂山小隱

徐問

棲息方茂嶺。居然侶樵客。樂茲林藪趣。遂忘市朝役。
沿澗搴紫萼。出谷隨飛翮。興來調素琴。音自諧金石。
猗蘭在幽翳。芳馨襲衣幘。陶陶共樵酌。忽忽浮雲夕。
弄艇深堰中。顧見水月白。

別家

孟洋

僕夫早嚴駕行行之楚鄉依依戀故里尊俎臨道旁
親友偕集送兒女泣成行隣國非遐征歲月未可量
白露塗郊原秋草日焜黃沙禽並栖宿鴻鴈東西翔
且爲斯須留日晚途路長不云行役苦徒令居者傷

、貽友人

清雲度高漢落日下遠戍行子倦孤征稅駕咸陽暮
空林宿雨微虛簷滴松露悵然懷美人昔會今不晤
濁酒誰爲傾強歌未成趣豈無四海士新交不如故

新秋登玄覽臺分韻得玉字

陳錫

靡靡流火西鮮飈掃餘燠竒懷邁良辰散步粵山麓

林巒蔚葱蒨竚立壑繚而曲振纓陟崇臺神情若新沐
綽約臺上人清揚美如玉冥心觀太初天地眇一粟
幻形忘贅疣委運付亭毒浮雲寓太虛不滿一捧腹
悠哉偕友朋適意此盤谷岸幘南斗旁雲溟騁遐矚
徜徉四山暝日入歡未足秋聲動喬林流螢度踈竹
松燈奚待篝明月自爲燭真樂同逍遙豈必驂黃鵠

、雜詩

薛蕙

玉以采自斲丹以澤自銷高才耀當時荼毒竟相招
傅子感蜚蛾張公喻鷓鷯思患豈不微履險果焉逃
嗟哉世路間覆轍常所遭千金憚垂堂胥靡易登高

願隨方外士。杖策歸蓬蒿。

雜體詩五首

劉文學公宴

步入西苑園。遊戲芙蓉池。明月照綠水。神燄散文漪。
層軒跨通川。雕檻承丹梯。衆賓列長榻。不醉且無歸。
菡萏泛流波。華葉互參差。清歌隨風轉。宿鳥東西飛。
公子興藻思。濡翰相招携。小臣非吉甫。答賦安能希。

潘黃門羈宦

登城陟層軒。遙望洪河隈。迅焱拂穹阪。陰湍涌幽厓。
哀鴻唳空臯。征鶴翔高隄。長秀延苞蔓。喬榦垂華蕤。

跂予顧南路。目極眺京畿。清洛迴無津。崇芒鬱崔巍。
服事就外役。夙夜守班司。具瞻慚民望。嘉命慊皇私。
異彼伐檀人。徒蒙素餐譏。撫已良自悼。何以蔽前非。
操刀無餘技。烹鮮有遺規。雖乏禮樂才。富庶聊可希。

盧中郎感交

日夕歷城闔。迴策步林囿。北眺邯鄲道。南瞻太行岫。
幽泉激清瀾。荒薄深長秀。曠野零飛藿。重巖響哀狖。
彷徨含遠念。眇眇展遐覲。燕趙負豪畧。土風負所究。
廉頗守長平。秦人却西寇。李牧出雁門。虜馬避南狩。
疇曩溝運會。匠者顧微陋。謬升朝右位。濫陪群賢後。

質非荆山璞雕飾良已厚中區增震蕩邊鄙多斥埃
投跡依帷幄短策非可售仰而昔賢軌嘉惠自難副
斯言豈虛作亮之惟朋舊

謝臨川遊山

徂節淹登臨開歲促遊翫陰厓雪猶積陽溪水始泮
進帆憇絕壁抗策徙穹岸撫化雖未盈即事已可玩
幽谷風華媚晴峯雲采粲尋異跡轉緬覽勝景迭換
洲分島參錯巖聚岫迴亂丹梯架懸梁石室構層館
初經洞穴底乍出翠微半羽人謝世運靈境變昏旦
汗漫無冥期䟽屬有塵絆放懷聊自慰含情爲誰歎

顏特進侍宴

鈞臺書夏典靈囿誦周篇嘉會隆先祀豫遊及茲年
春方協時律祕駕動星躔平圃躋倒景神臯徑中天
赤羽匝魯嶠青翰驚廣川華幢互幽藹藻帳競高褰
首歲布皇澤萬象光且鮮炎晷曜微霄宿氛霽遠山
瑞烟拂蘭甸祥飈沉芝廬睿眷備終讌宸惠普下筵
從邁咸世哲賡歌盡朝賢短羽因孤蹇明淑慙衆妍
勅躬方自勗敷言非可宣

效阮公詠六首

飄風振玄幕若木零朱華六龍匿西山濛汜揚其波

翩翩市中子於心太回衰不見顛顛色但聞慷慨歌
卑危誠未遠禍亂豈在多人人恤其私安能尚顧他
已矣勿重陳嗟予可奈何

朝登古臺上遙望大河陰朱明來自南隆暑倏已臨
丹霞耀陽景溼露霑玄林炎風振曾柯鳴蟬響哀音
四時代終始變化遞相尋盛長固殊昔遲暮方在今
感物切悲情愴歎傷我心

曠望三河側輕車並華輶壯盛值今辰志欲一來遊
路旁續紛子馳騫各有儔腹內懷辛螫側目起相讐
晏嬰畏仲尼惠施忘莊周疑似不可居俛仰生蓄尤

感彼行露章獨處安可求

蟾蜍宿南箕陰晁淪東溟乘風避其炎首旦集魯城
神焱鼓洪濤雷電正縱橫大魚裂地底崑崙勢如傾
西山有精衛舉翼方遐征志意豈不偉惜哉焉所成
朝遊東海上親見安期生袖携麻姑書揖余上天行
匆匆從之去一舉凌太清白榆何歷歷桂樹亦青青
朱雀七十二鼓翼相和鳴玉女願我笑執手戲紫庭
萬歲同愉樂天地長齊并

天上何所有上有九重臺日月闢房牖河漢界兩階
白虎夾路隅青龍啾啾啼五岳當東脯四海充一杯

衣裳被雲氣，左右結雙蜺。彗星垂爲帶，北斗束爲觜。
舉足歷顛蒼，往往不復迷。朝集扶桑東，夕降若木西。
遊仙三首

遠遊訪玄洲，西造崑崙城。長風萬里至，吹我飄飄行。
崑崙何岩堯，曲阿蔭滄溟。碧樹夾蘭臺，雲房鬱葱青。
徙倚東廂隈，北上歷羽庭。啓匱發靈圖，上有列仙名。
久淹變化途，今日乃長生。

東南有青雲，鬱鬱曜瀛洲。巖隈列紫林，丹水絡層丘。
峩峩三珠宮，遠望似煙浮。山川屬靈壤，光麗異神州。
列仙乘羽車，妖女並來遊。蒼龍扶玉軼，翼以雙素蚪。
羲和不敢驅，朱光正淹留。徘徊離宮中，歲紀倏千周。
采藥謁東海，芝石被神階。借問此何鄉，迺是真人所。
青峯萬餘仞，去天復幾許。泆泆赤泉涌，亭亭白雲舉。
淒風薄穹岫，鸞鶴整其羽。空山寂無人，含笑獨延佇。

候大駕

西北收皇旅，東南歸帝京。山驅八駿下，海泛六龍行。
後車環外區，前駟集神垵。支兵聯四校，中堅屯九營。
絳氣曳朱竿，青雲生翠旌。鐃歌綵吹激，行漏玉鸞鳴。
入覲萬國至，清宮群后迎。金貂雜流景，圭璧委繁星。
錄功對五帝，合符朝百靈。俯窺地紐正，仰瞻天柱平。

郊裡方展義，升封將告成。祈招美王度，長謠誦休明。

曉坐

戴欽

披衣坐清曉，夜氣湛虛清。萬慮寂回照，五雲輝廣庭。
花月在簾鈎，晶晶玉樹明。宿雨尚未霽，冥鴻遠蜚征。
物從元化定，性以玄感精。方悟靜理妙，始忻隱者貞。
從茲謝世界，超然得無生。

長洲野泊

蔣山卿

停舟暫依渚，憇此嘉樹陰。涼飈時落木，幽澗忽鳴禽。
秋竹長新篁，踈花開晚林。睠茲風景異，重感平生心。
逍遙坐日夕，聊用消煩襟。

夏日田居即事

東菑耘事畢，老翁自閒閒。鼓腹何所知，徘徊墟落間。
斜日上高原，一望江南山。舉林玩柔荑，涉澗弄潺湲。
欣然適其適，日黑始來還。了無一可說，呼兒掩柴關。

送黃子歸省

舒芬

送君臨岐路，惆悵話同袍。風雲動冠蓋，雨露謝蓬蒿。
西山日影薄，北極天樞高。誰能懷百憂，為君撫春醪。

秋江雜懷

張洽

翩翩雲中鳥，歸飛薄叢林。日落天雨霜，回波清且深。
玄陰翳高壁，草際寒蛩吟。方舟在萬里，離索故難任。

黃鳥亦求友，誰不懷所欽。仰以觀列星，俯以調素琴。
列星光且繁，素琴有遺音。星光照我衣，遺音傷人心。
、薊哀王輓歌四章應制

鳳雛何翩翩，頡頏翔天關。悲風起中路，竟去不復還。
九苞既零落，竹實空摧殘。唯餘青禁月，千古照丹山。
曉發黃金屋，暮歸北山岡。蕭蕭薊門路，白日慘不光。
寒風厲廣野，素旄隨飄揚。鴻名照金石，脩短寧足傷。
嚴霜度中夜，悴此瓊瑤柯。芳華悲萎質，逝水感頽波。
松柏古原上，落日青峨峨。物理有摧折，憂傷竟如何。
宮烟散輕彩，笙斷鳳凰樓。獨憐王子晉，一往無春秋。

蘭殿寒雲泣，椒房明月愁。蛟龍盤玉匣，寂寂掩山丘。

同秦泉洞野登廣寒樓分韻得日字

御苑城西樓，遼后昔膏櫛。平臺俯川原，飛閣亂雲日。
風霜悲世殊，木落秋氣瑟。寒花明前除，吟蛩傍殘壁。
丹青摧舊顏，雕楯行蝸出。翳翳林中樾，樓下水交滴。
因思被袵人，百代寡儔匹。

、題畫

仙人住金闕，緬懷溪山幽。每於圖畫裏，悠然見滄洲。
庭除咫尺間，四顧生寒秋。微茫辨川谷，群峯照清流。
藤蘿覆石壁，古木如雲稠。草屋三四椽，中有羲皇儔。

扁舟江上來，疑是王子猷。浩蕩入烟霧，短棹隨輕鷗。
對此意飛越，忽若千里遊。始知魏闕下，亦自有丹丘。

贈秦泉子

翩翩秦泉子，戢耀栖朱明。竭來隱金馬，飈飛復南征。
言采菖蒲花，笑揖安期生。圓景煥中夜，九鳳狎霞鳴。
相携駕之去，逍遙騰紫清。願滌垢氛耳，豁落聞天聲。

夜過洞庭

曉發吳昌門，夕度黃陵汜。日暮江帆遲，洞庭三百里。
微風澹無波，明月照天水。隱隱見君山，鍾聲翠雲裏。

樓船坐中流，長歌白波起。

擬青青河畔草

周祚

春日長安陌，落花何脉脉。陌上草青青，行人那復停。
歌臺臨大路，相思春日暮。寶騎金作鞍，遙遙花裏度。
去時鸞鏡臺，照郎未曾開。青天挂明月，弦望待歸來。

望泰山

廖道南

岱宗高龍從，群峯凌紫穹。日觀影扶桑，月嶂烟朦朧。
飛泉走其下，宛然雙白龍。上有玉女池，銀河瀉長虹。
玉女散天花，萬朶青芙蓉。仙人王子喬，絳節朝上宮。
遺我金檢書，期我遙相從。我欲從之遊，雲路險且重。

何當謝塵鞅。晞髮咸池東。

初春訪黎韶山北園不遇 梁世驃

獻歲乘休暇。選勝訪名園。城春紫烟靄。門靜綠陰繁。
逶迤鶴逕窈。睨睨鸞樓喧。五柳陰芳沼。列岫圍孤軒。
碧泉澄玉甃。丹洞隱玄猿。鸞情極冲想。鳳翮當高騫。
文光絢戶牖。淑氣浮蘭蓀。佇立簷日轉。遙見江雲翻。
瞥爾翔寥廓。超然塵俗蠲。看竹若有得。歸路欲忘言。

陪大中丞金陵顧公玩月上方山

袁孝

詰日趨廣渡。薄莫陟崇岡。川原氣候改。林麓鬱蒼蒼。

陰霞冠陽阿。密徑阻脩梁。樵采歸已絕。游豫樂未央。
既枉嘉遯儔。遂謠叢桂章。霜楓麗丹臚。秋色紛難詳。
飛月出層霄。沆露沾衣裳。列筵回澄湖。肆眺臨遐荒。
不醉諒無歸。逆風騰羽觴。令德暢徽音。示我以周行。
悅賢喻飢渴。覲止承寵光。各勉日新志。豈弟神所康。

月溪謠寄贈興化黃太守 郭廷序

壺山迤紫邏。木蘭澄翠川。結璘耀霄漢。山水含芳鮮。
巖花零露滑。吐杜蔚烟綿。瑤光應羲馭。桂斧睇吳僊。
萬里迥虛照。秋毫寧棄捐。扶輿肇廣運。珎綬懷丁年。
分符洵有美。樹績當無前。電驥始遐步。雲鵬漸高騫。

丹衷向龍闕、玄理遺魚筌、願為環與璪、奉子同周旋、

過彭澤懷陶狄二令

孫學古

忽忽涉江漢、悠悠歷冬春、千載聞二哲、高蹤彭澤濱、
淵明避宋裕、歸作羲皇人、遑犖狄懷英、謫官罹札晨、
曜靈沒西崦、圓景曜東津、天運自迴復、龍螭隨屈信、
嗟我資童甫、適粵逢明辰、願言篤丹悃、臨清思采蘋、
王事慨鞅掌、夢寐徒相親、

眺初陽臺從妙智院北探紫雲洞

黃省曾

登登倪陽臺、曖曖覲羲燭、停爾絕仞巔、娛我芳春日、

蓬蹊遞宛轉、皎鏡互迴復、抗策凌煙虹、披蘿扣巖屋、
江梅獻餘素、山篁屯故綠、法雲竟虛綴、慧日皆妙屬、
敞窓迎遠心、登閣寄游躅、玲瓏投瀕洞、峭崿下空曲、
幽悰自茲開、賞心於此足、嶠豁宜考槃、期將肇新築、

詠懷

梁有譽

白日匿大谷、驚風飄無時、猛虎前噬人、玄熊嗥聲悲、
悵彼遠行子、嚴霜履嶮巖、嶮巖朝征裘、芻糲日晏不知疲、
問客何方來、王事有程期、結髮事明主、捐軀誠不辭、
群龍翔天路、皇風肅以夷、樹澤周荒裔、蠕息咸熙熙、
柰何彼行客、歲晏恒苦饑、上天垂末光、白骨銜恩私、

黃司馬青泛軒

達人慕恬寂，開軒負西郭。芊綿引蕙田，逶迤通菌閣。
積芳集隆墀，躑勝控遙壑。藥氣通幽洞，湖光耿華薄。
青桐帶露踈，翠羽衝花落。蜃月鏡踈櫺，鵬雲冠虛幕。
真筌一以契，琴書聊爾託。鶴性在烟霞，鳳想存寥廓。
即此願深栖，陋彼郊居作。

明音類選卷之三

明音類選卷之四

七言古詩

蜀國絃

劉基

胡笳拍斷玄冰結，湘靈曲終斑竹裂。為君更奏蜀國
絃，一彈一聲飛上天。蜀國周遭五千里，蛾眉迢迢連
玉壘。岷嶓出水作大江，地若天浮戒南紀。舒為五色
朝霞暉，慘為虎豹嗥。陰霏翕為千嶂雲，雨入噓為百
里雷霆飛。白鹽雪消春水滿，谷鳥相呼錦城煖。巴姬
倚歌漢女和，楊柳壓橋花纂纂。銅梁翠氣通青蛉，碧
鷄啼落天上星。山都號風寡，鵠泣杜鵑鳴。咽愁幽冥

商悲羽怒聽未了，窮猿三聲巫峽曉。瞿塘浪浪翻九淵，倒瀉流泉喧木杪。樓頭仲宣羈旅客，故鄉渺渺音塵隔。含悽更聽蜀國絃，不待天明頭盡白。

、明月子

朱閣綺疏瓊作戶，明月照人秋獨苦。桂花吹冷眠不成，誰家高樓絃管聲。倚樓空望別離處，唯有清光自來去。月圓正好缺復催，人生見月能幾回。

、隴頭水

隴頭水征夫淚，征夫之淚滴隴頭。化為水入秦川流，水流向秦川。嗚咽嗚不已，何因得天風吹入君王耳。

秋夜月

秋夜月黃金波照人哭，照人歌人歌人哭。月長好，月缺月圓人自老。

、思美人

雨欲來風蕭蕭，披桂枝拂陵苕。繁英隕鮮葉，飄揚煙埃靡招搖。激房帷發綺綃，中髮膚替寂寥。思美人隔青霄，水渺茫山峇堯。雲中鳥何翛翛，欲寄書天路遙。東逝川不可邀，芳蘭花日夜凋。掩瑤琴，閑玉簫，鬼爨眾心搖搖。望明月歌且謔，聊逍遙永今宵。

、王子喬

王子喬乃是髭王之子皇王之孫深宮洞房不稱意
却駕白鶴尋軒轅虹蜺爲旆雲爲旛飄然乘風上崑
崙王子喬去何之朝發暘谷暮崦嵫六龍九鳳相追
隨穆王西上不得王母訣胡爲元氣獨爾私王子喬
去不還后稷功業委如山猶有九鼎知神姦王城日
夕生荊菅爾獨胡爲白雲間王子喬空長嘆

氣出唱

今日不樂振策遠游東上泰山魏何脩脩道逢仙人
要我同仇蒸霞爲糧烹玉爲羞玄英素糝光華蔓流
日觀菡萏葩華九州令我從之身輕若浮道以五鸞

翼以兩虬朝翔玄圃夕止蓬丘謁見王母雲眉月眸
青蛾三千或舞或謳風吹琅玕聲如鳴球雜花並開
莫知春秋洪崖先生勸我此留自揣凡骨非仙者儔
七情交煎一觸百抽又病顛僻無藥可療崇崇清宮
蕩無涯際列仙如沙不少一漚王母笑聽拜謝扣頭
歸來山林曷標曷鉤熙熙泰和長樂無憂

邯鄲才人嫁爲厮養卒婦

邯鄲有才人豔色如朝霞嫁作厮養婦雲鬢埋泥沙
憶昔趙王金盛日夜夜綺筵張寶瑟中山美酒盈羽
觴一笑黃金滿千鎰繁華過眼如轉蓬故宮禾黍秋

茫茫明珠白壁走函谷。墜簪遺珥空悲風。人生最苦
是衰老。白首無歸向誰道。華門夜永。月光寒。引聽鴛
駘。齧枯草。

寄宋景濂四首

我思美人。乃在仙華之山。山前夜半掛河漢。天津兩
旗俯可攀。我欲從之阻河關。初平不來白羊死。瘦骨
蝕盡莓苔頑。風沙蕭蕭隔人間。玄霜日夕凋玉顏。有
鳥有鳥。丁令威。側身下上空。孤飛女媧石。墜鼈脚折
海水散作雲霏霏。山中有奇樹。一華一千秋。美人何
不折寄我。使我嘆恨長凝眸。深沉洞谷山鬼集。陰氣

六月冰霜留。嗟哉美人誰與儔。明年定約赤松子。與
爾群峯頂上遊。

有美一人兮。美且仁。自我不見兮。不知幾春。仰玄穹
兮。睇參辰。爲合爲離兮。孰測其因。青冥無階兮。江海
無津。風雨茫茫兮。蛟龍怒曠。安得羽翼兮。致我與隣。
有美一人兮。美且都。青霞爲衣兮。白雲爲裾。被秋蘭
兮。佩珣玕。泰和與游兮。中黃與居。瞻望弗及兮。芳歲
其徂。山高水深兮。道阻且紆。安得羽翼兮。致我與俱。
有美一人兮。在山中。蒼眉黑鬚兮。玉雪其容。飲沆瀣
兮。食紫虹。澡石泉兮。灑清風。邀初平兮。從赤松。超逍

送方樂無窮。安得羽翼兮致我與同。

夜聽張道士彈琴歌

白間含光月照席。梅花入簷珠的皪。蕊宮道士彈七絃。明星在樹霜滿天。鏘如暗泉發幽竇。悄若空山叫猿狖。霧雨寒吹松栢響。波濤怒激蛟龍鬪。神奔鬼避入杏宮。鸞孤鶴寡風冷冷。湘娥宵攀竹枝泣。紫鳳曉啄梧桐鳴。悽悽欲斷還復續。啼鴛一聲階草綠。若然清商行素秋。落葉灑地蟲啾啾。擁衾聽之消百慮。夢逐行雲自來去。九疑連天洞庭遠。海闊烟深不知處。蕊宮道士聽我語。世無予期誰識女。棗閭濮上方施。

行白雪陽春棄如土

題陸放翁賣花叟詩後

君不見會稽山陰賣花叟。賣花得錢即沽酒。東方日出照紫陌。此叟已作醉鄉客。破屋含星席作門。濕螢生竈花滿園。五更風顛雨聲惡。不憂屋倒憂花落。賣花叟。但願四海無塵沙。有人賣酒仍賣花。

題安仁余氏留餘堂

君不見石季倫。對案方丈皆八珍。珊瑚夜光視如土。寧知汨沒同埃塵。又不見李贄皇。平生鼎食滿萬羊。中厨烟火宵未冷。詔書趣使趨南荒。金谷名園委蔓。

草平泉荆棘無人掃。榮華瞬息可奈何。空令過者傷
懷抱。世人積金遺子孫。一朝金盡難復論。古來好還
有天道。君看漢代于公門。

為祝彥中題山水圖

高軒玲瓏不受暑。半幅輕綃宿烟雨。白間素壁生空
明。似聞水聲繞庭宇。松髯拂天藤蔓垂。枯根瘦石相
因依。寒濤不驚虎兕卧。嵐翠欲與蛟虬飛。空江悠悠
一漁艇。渚白沙明萬魚靜。武陵桃花何處尋。落日微
風片帆影。

涉江採荷花

汪廣洋

郎騎白馬臨江滸。妾採荷花涉江浦。郎情若比藕絲
長。妾心勝似蓮花苦。藕絲長難縮。結蓮心苦莫如妾。
天長地久此心存。花落花開任情絕。

從軍樂

從軍樂。右掉忘歸左繁弱。天子有詔征不廷。重選前
鋒掃幽朔。出門萬里不足平。宛駒照耀黃金絡。去年
鏖戰葱嶺東。今年分戍蓬婆中。蓬婆城外一丈雪。半
夜紫駝號北風。少年忽憶慷慨事。便起酌酒澆心骨。
酒酣耳熱聲摩空。手舞三尺青芙蓉。前將軍右都護。
壯士在榮不在富。一朝手格樓蘭歸。人擁都門看馳

驚朝承恩暮承顧，出入三軍稱獨步。都門富兒空萬
數，人生豈被從軍誤。

大醉歌

王冕

明月珠不可禱，連城壁不可鋪。世間所有皆虛無，百
年光景駒過隙。功名富貴將焉如？君不見北邙山石
羊石虎排無數。舊時多有帝王墳，今日纍纍蟄狐兔。
殘碑斷碣爲行路，又不見秦漢都。百二山河能險固，
舊時宮闕巨雲霄。今日原田但禾黍，古恨新愁迷草
樹。不如且買葡萄醅，携壺挈榼閒往來。日日大醉春
風臺，何用感慨生悲哀。

水仙圖

寒風蕭蕭月入戶，渺渺雲飛水仙府。仙人一去不知
所，池館荒涼侶無主。江城歲晚路途阻，解后相看顏
色古。環珮無聲翠裳舞，欲語不語情悽楚。十二樓前
問鸚鵡，滄海葉田眯塵土。王孫不歸望湘浦，芳草連
天愁夜雨。

寄太素高士

我昔扁舟上耶溪，尋君直過丹井西。長松月冷啼子
規，春風滿地芳草齊。樓殿玲瓏金碧湧，鐘聲不出松
雲重。老猿掬澗山影亂，翠禽啄露巖花動。此時相見

不作難握手。笑上松花壇。壇下十萬青琅玕。空陰漠漠常風寒。我對青山論今古。青山茫茫無一語。知其與我忘爾汝。石瓢酌我雲根乳。冷然使我肝膽清。飄裾欲度浮雲輕。千峯回影陷落日。萬壑欲盡松風聲。回首溪山忽成別。幾見江梅飛白雪。洞庭湖上聽夜雨。仲宣樓頭望明月。皛皛對景傷古情。寸心欲吐書難憑。何當相晤一抵掌。與君細看真蘭亭。

天台行

東南海闊秋無烟。天台山與天相連。丹霞紫霧互吞吐。重崗複嶺青盤旋。惟石長松石磊磊。落落神芝靈

草綿綿。芍芋芋。金堂玉室異人世。桃花流水春娟娟。送君此去意何適。幅巾颯颯衣翩翩。檄書初開雲五色。不嫌坐上寒無氈。我擬尋真拾瑤草。在家作想三十年。乘風幾欲奮飛去。水流花謝難寅緣。山空無塵明月冷。時復夢裏聞青猿。君今登登玉霄近。為我問訊丹丘僊。丹丘僊人如有在。我欲徃受長生篇。爛熳白石松下眠。

金陵行送余局官

李白題詩舊游處。桃花楊柳春無數。六代衣冠委草萊。千官事業隨烟霧。大江西下秦淮流。石首寂寞圍

荒丘原田每每盡禾黍。青山不掩諸公羞。高樓如天
酒如海。觸景令人感慨紅墮香愁。燕子飛風流王
謝今安在。我欲去尋朱雀橋。澹烟落日風蕭蕭。交疏
結綺杳無跡。但見野草生新苗。小兒紛紛競豪縱。區
區割據成何用。芙蓉水冷燕支消。千古繁華同一夢。
傷今弔古如之何。頭上歲月空蹉跎。君行喜有絲五
絃。宦情不似詩情多。江南故事可知否。白雲靈靈變
蒼狗。休論平生錦機手。浩歌且醉金陵酒。

趙千里夜潮圖

去年夜渡西陵關。待渡兀立江上灘。灘頭潮來倒雪

屋。海面月出行金盤。水花着人如撒霰。過耳斜風快
如箭。叫霜鴻鴈零亂飛。政侶今年畫中見。寒烟漠漠
天冥冥。展玩陡覺心神清。便欲吹簫騎大鯨。去看海
上三山青。

關河雪霽圖為金陵王與道題

飛沙翳人風墮幘。老夫倦作關河客。歸來松下結草
廬。卧聽寒流雪山白。悠悠如此四十年。世情脫畧忘
間關。今晨見畫忽有省。平地咫尺行山川。鳥道連雲
出天險。玉樹瓊林光閃閃。陰崖絕壑望欲迷。冰花歷
落風淒慘。枯槎側倒銀河開。三巴春色隨人來。漁翁

舟子相笑語，不覺已過洪濤堆。溪回浦淑石齒齒，溪
上人家成草市，長林大谷猿鳥稀。小步寒驢如凍蟻，
西望太白日色寒。青天削出蛾眉山，人生適意隨所
寓。底道歷涉窮躋攀，明朝攬鏡成白首。春色又歸江
上柳，何如高堂掛此圖。浩歌且醉金陵酒。

雪麓漁舟圖

大山小山無寸青，長江萬里如月明。楚天不盡鳥飛
絕，老樹欲動風無聲。何人方舟順流下，草衣箬笠俱
瀟灑。蓬底有兒能讀書，不是尋常釣魚者。玄真子陶
朱翁避世逃名俱已矣，後來空自談高風。我視功名

等塵垢，何似忘言付杯酒。武陵豈必皆神仙，桃花流
水人間有。

宛轉詞

孫炎

流黃機響春閨織，成幼時華綵衣。玉為容，水為瞳。二
十嫁與梁家鴻，妾鼓瑟，郎鼓琴。海枯石爛同一心，雲
母屏夜向宜。郎是明月妾是星，鞭珊瑚，障流蘇。郎騎
高馬妾坐車，女蘿枝，延兔絲。綿纏到老郎自知，徑寸
珠水中居，團圓到老妾不如。

迎日詞

鳳炙芳麟脯，瑤席芳桂俎。樂萬舞，芳如雲。吹笙竽，芳

龍二女。千子子。兮載以輿。六蒼虬。兮歷天衢。雲霏霏。兮夜未艾。執長轡。兮久相待。

龍灣城

龍灣城壯如鐵城。下是長江城。頭有明月。月色照人心。不移江水長流無盡時。

題好溪圖送憲使黃繼先

君乘馬望君來。括蒼下。君乘舟望君來。好溪頭。好溪水。水生玳瑁魚。好溪水。生明月。珠好溪水。生青珊瑚。使君來。此月再樞。惟飲此水。無一需。使君之清水。不如臨別。贈君青絲轡。隨君馬頭行。萬里相思之心。有如

水

寶劍歌

寶劍光耿耿。佩之可以當一龍。只是陰山太古雪。為誰結此青芙蓉。明珠為寶錦為帶。三尺枯蛟出冰海。自從虎革裹干戈。飛入芒碭育光彩。青田劉郎漢諸孫。傳家惟有此物存。匣中千年睡不醒。白帝血染桃花痕。山童神全眼如日。時見蜿蜒走虛室。我逢龍精不敢彈。正氣直貫青天寒。還君持之獻明主。若歲大旱為霖雨。

望夫山

陶安

春風江頭吹柳枝。閨中佳人怨別離。長城雲樹渺天
北。重見郎面。知何時。欲飛向若無羽。翮登山望遠。雙
瞳碧。寸心似石。無轉移。偏體。從之總成石。相思誓與
天地久。肌骨猶香。堅不朽。征夫飄泊。終不歸。縱活孤
闈。獨難守。岫花結簪。螺髻綠。雨露朝昏。足膏沐。銀河
雲錦織。木裳月如光。鏡天為屋。嗚呼。長年望夫。夫不
歸。何似嫦娥守幽獨。

前有尊酒行

詹同

前有一尊酒。後有三尺墳。墳前兩樹花。墳中不知春。
分明記得墳中叟。曾共當年飲春酒。

七夕吟同張士行賦

張以寧

銀河迢迢向東注。玉女盈盈隔秋渚。金梭飛飛擲烟
霧。織作青鸞寄幽素。青鸞織成不飛去。仙郎脉脉愁
無語。無語相望朝復暮。白榆搖落成秋樹。藕花香冷
鴛鴦浦。天上銀橋寶車度。風清蕊殿開瑤戶。雲屏霧
褥芙蓉吐。經年香夢遙相許。一夕離腸為郎訴。弄姬
妬人留不住。天鷄角角扶桑曙。龍巾荏苒啼紅霧。亂
點雲開逗飛雨。伯勞西飛燕東翫。河乾石爛愁終古。
翠樓乞巧娉婷女。鏡裏青螺掃眉嫵。博山沉煙裊雙
縷。不識人間別離苦。

卷繡篇為雲中呂遵義作

蘼蕪葉暗江雲暖。翡翠單飛怨春晚。陳女多情玉鏡
分。陸郎薄倖斑駁遠。寶鴨團爐百和香。錦鴛方褥五
文章。陰陰垂柳籠書幌。點點飛花落繡床。雙鸞欲寄
金閨倩。燕月吳雲不相見。柔腸萬轉逐迴文。亂緒千
條縈弱線。女貞枝上燕雙棲。夜合花前思欲迷。停針
嘿嘿無人會。但覺春山兩葉低。曉嘶綉勒門前路。夜
炙銀燈帳中語。指點香茸舊唾痕。見妾朝朝斷腸處。

題李廣利伐宛圖

宋濂

貳師城頭沙浩浩。貳師城下多白草。六千鐵騎隨將
軍。風勁馬鳴高入雲。師行千里不畏苦。戰士能教食
黃土。上書天子引兵還。使者持刀遮玉關。烏孫輪臺
善窺伺。死若不降輕漢使。璽書昨夜下燉煌。太白高
高正吐芒。戍甲重徵十八萬。居延少年最翹健。殺氣
漫漫日月昏。邊塵冉冉旌旗亂。水工決水未絕流。旄
竿已揭宛王頭。執驅校尉青狐裘。牝牡三千散若丘。
惜哉五原白日晚。到居水急游魂返。

題李易安所書琵琶行後

佳人薄命紛無數。豈獨潯陽老商婦。青衫司馬太多
情。一曲琵琶淚如雨。此身已失將怨誰。世間哀樂常

相隨易安寫此別有意字字似訴心中悲。永嘉陳侯
真好奇。高齋展卷神與馳。輕塵弱草知何處。蔡琰胡
笳各一時。生男當如魯男子。生女當如夏侯如。千年
穢跡吾欲洗。安得潯陽半江水。

題宗忠簡公誥後

忠簡名澤盡忠守汴請高宗還為汪廣所忌
而死

青城妖祲連雲赭。犬羊在都龍在野。百年藝祖舊河
山。萬騎長驅若冰解。京城留守一世豪。仰天雪涕風
蕭騷。起扶白日照河北。赤手欲障三秋濤。義旂戛天

天為泣。四方猛士聞風集。自期徇國與天通。豈謂忠
言反難入。披肝上疏留至尊。乘輿不顧東南巡。拊牀
三叫大星落。非天棄宋良由人。功業無成志可紀。古
來英傑多如此。君侯心事漢武侯。偉氣英聲冠千祀。
我來已恨生世遲。不得親觀忠勇姿。每過鄉邑髮猶
豎。綸誥况是當時為。却憶前朝司馬死。章蔡群姦乘
間起。國雖未亂政先亡。萬里蒙塵從此始。吁嗟黼黻
真奴臣。賊君致寇肥其身。姓名汗眼尚欲嘔。君侯在
位能無嗔。侯乎侯乎慎勿嗔。誰使彼奴操國鈞。君不
見汴京禮樂正全盛。江南杜宇啼天津。

將進酒

高啓

君不見陳孟公，一生愛酒稱豪雄。
君不見楊子雲，三世執戟徒工文。
得失如今兩何有，勸君相逢且相壽。
試看六印盡垂腰，何似一卮長在手。
莫惜黃金醉青春，幾人不飲身亦貧。
酒中有趣世不識，但好富貴亡其真。
便須吐車茵，莫畏丞相嗔。
桃花滿溪口，笑殺醒遊人。
絲繩玉缸釀初熟，搖蕩春光若波綠。
前無御史可盡歡，倒著錦袍舞鸚鵡。
愛妾已去曲池平，此時欲飲焉能傾。
地下應無酒壚處，何苦寂寞孤平生。
一杯一曲我歌君續，明月自來不須秉燭。
五岳既遠三山亦空，欲求神仙在杯酒中。

王明君

亦空欲求神仙在杯酒中

都門塵拂春風面，臨別看花淚如霰。
君王惆悵惜蛾眉，不似前時畫中見。
白髮呼韓感漢恩，寧胡謾號關支尊。
擅裘肉食本異俗，不如但嫁巫山村。
黃沙白雪無城闕，手冷鷓鴣弦夜彈。
歌相隨萬里到穹廬，只有長門舊時月。
妾語還憑歸使傳，妾身沒虜不須憐。
願君莫殺毛延壽，留畫商巖夢裏賢。

憶遠曲

揚子津頭風色起，郎帆一開三百里。
江橋水柵多酒

鑪女兒解歌山鷓鴣武昌西上巴陵道聞即處處經
過好櫻桃熟時郎不歸客中誰爲縫春衣陌頭空問
琵琶下欲歸不歸在郎足郎心重利輕風波在家日
少行路多妾今能使烏頭白不能使郎休作客

羈旅行

馬頭北風吹地白手冷時驚墮鞭策隻候欲來雙候
過客程不盡關山多狐狸縱橫古城壞旗折官亭無
酒賣土風處處殊故園鄉音只聞僮僕言天涯歲晚
無相識囊金已空歸不得暝投人家自炊黍土屋青
燈鴈啼雨此時暫解羈旅憂夢與家人夜深語人生
出門即苦辛何況長爲萬里身遠游總得功名好不
如貧賤鄉中老

太白三章

太白初升北斗落行人早起車鳴鐸豈願身離父母
邦山川路遠非不惡貧賤未知生處樂

太白正高北斗低行人出關鷄亂啼他鄉無人是知
已欲歸未歸東復西弊裘愧見家中妻

太白猶懸北斗没行人衣上霜拂拂下馬飲酒歌苦
聲新豐主人莫相忽人奴亦有封侯骨

夜飲丁二侃宅聽琵琶

江月未出明星懸。主人飲客夜不眠。坐呼伶兒撥四
絃。龍頭高擡玉軫圓。轉關未奏雙索先。勞嘈咽切斷
復連。澁如清澗溜凍泉。細若綠樹吟秋蟬。忽然繁急
何轟聞。風沙滿把撒四筵。鴈行驚起飛不聯。浮雲落
葉俱綿綿。一聲抹斷萬里烟。夢入紫塞愁胡天。問渠
怨恨有幾千。口不能說指爲傳。令人悵望思往年。梁
園楚榭長周旋。帷中曲宴羅綺鮮。夜遣飛騎迎嬋娟。
低鬟出拜絳燭前。文綵香縞搭左肩。曲項紫鳳抱半
偏。楓香一調妙入玄。好手正可羞紅蓮。座間豪客皆
詞仙。舉杯邀我賦短篇。贈之醉寫蜀錦箋。可當十萬

纏頭錢。如今遠客江海邊。欲聞絲音久無緣。故人已
散陵谷遷。生死流落俱堪憐。今宵聽此真偶然。顧影
憔悴非昔妍。長河欲曙落遠川。暫當歡娛反憂煎。詞
偶無言涕淚漣。此身如在潯陽船。

美人撲蝶圖

花枝揚揚蝶定定。風多力薄飛難遠。美人一見空傷
情。舞衣春來綉不成。乍過簾前尋不見。却入深叢避
鷺燕。一雙撲得和花落。金粉香痕滿羅扇。笑着莫向
園中歸。東家西家休亂飛。

姑蘇臺

金椎夜築西山土。催作高臺。醉歌舞。文身澤國搆王基。却笑先人獨何苦。銅鋪玉檻。盛繁華。幻出峯頭一片霞。望處直窮三百里。彼時應廢幾千家。蟠空曲路迷仙仗。攀鬱瑤梯。繞到上。外繞雕龍宛轉欄。中施綉鳳。葳蕤帳。熏爐長。蕪鬱金香。共道千齡樂未央。茂苑月來秋珮冷。洞庭雨過夏綃涼。當窓衆妓如仙女。揚袂迎風欲輕舉。人從天上見經過。鳥向雲間驚笑語。日暮橫塘花盡開。捲簾臺上望王來。宴舟初自觀魚返。獵騎還從射鹿迴。從筮不用持鉞隊。自列紅妝侍高會。香傳羅帕進黃柑。縷切鸞刀供玉鱠。燭光遠落太湖波。驚起魚龍出沒多。城上烏啼河漢轉。此時誰問夜如何。管絃嘈嘈聒人耳。不聞兵來渡溪水。欲携西子走登舟。醉倚畫欄嬌不起。瞑目無因到甬東。可憐一炬綺羅空。獻楣竟墮讐人計。賜劍應孤諫士忠。客來試問遺宮路。物色荒涼總非故。攘衣始信不虛言。滿地荆榛見零露。當年爭奪苦勞機。却把江山付落暉。聞說越王臺殿上。如今亦有鷓鴣飛。

董逃行

史侯稱臣董侯立。山東義師烽火急。羌兒夾輦奉西遷。百姓驅隨棄村邑。葦圭苑中高作營。千里不復聞

雞鳴舊宮焚燒無片瓦黃金盡出諸陵下長安城頭
日欲晡董逃歌殘歌布乎

悲歌

征途險戲人乏馬飢貧少米如富老美遊不如惡歸
浮雲隨風零亂四野仰天悲歌泣數行

穆陵行

宋理宗陵也在會稽為元初西僧所發

樓船載國沉海水金槌晝入三泉裏空中玉馬不聞
嘶日落寢園秋色起魚燈夜滅隧戶開奇劍已出空
幽臺晃胡暗識寶氣盡六陵松栢悲風來玉顛深注

駝酥酒誤比戎王月支首百年帝鬼泣穹廬醉骨飲
究愁不朽幸逢中國真龍飛一函雨露江南歸環佩
重遊故山月冬青樹死遺民非千秋誰解錮南山世
運興亡覆掌間起輦谷前馬蹄散白草無人澆麥飯

次韻答朱冠軍遊西城之作

前年城西作冶遊柳條拂蓋花迷舟笑看明月問狂
客我舉太白君當浮去年城西復偶住酒伴家家邀
即去東隣寺裏花正開半醉半醒遊幾度今年有花
愁獨尋閉門三月卧春陰將軍小隊遊何處日暮空
聽車馬音皐橋泰娘殊窈窕為我噴來歌水調客愁

草草不易除。世事茫茫本難料。玉壺一雙秋露傾。惟此可以忘吾情。醉歸共射草中石。笑劈弓弦霹靂鳴。

唐昭宗賜錢武肅王鐵券歌

妖兒初下含元殿。天子仍居少陽院。諸藩從此擁連城。朝貢皆停事攻戰。岐王已去梁王來。長安宮闕生蒿萊。天目山前異人出。金戈雙舉風煙開。羅平惡鳥啼初起。犀弩三千射潮水。歸來父老拜旌旗。灑酒搥牛宴鄉里。擊毬駿馬驕春風。錦袍玉帶真英雄。詔書特賜誓終始。黃金鏤字旌殊功。虎符龍節彤弓矢。後嗣猶令赦三死。盡言恩寵冠當時。天府丹書未踰此。

摩挲舊物四百年。古色滿面凝蒼烟。天祐宰相署名在。尋文再讀心茫然。古來保族須忠節。受此幾人還覆滅。王家勲業至今傳。不在區區一方鐵。人生富貴知幾時。泰山作礪徒相期。行人曾過表忠觀。風雨斷蘚埋殘碑。

張中丞廟

延秋門上烏啼霜。羯奴曉登天子床。江頭老臣淚暗滴。萬乘西去關山長。公卿相率作降虜。草間拜泣如群羊。當時不識顏平原。豈復知有張睢陽。孤城落日百戰後。瘦馬食尾人褻瘡。男兒竟為忠義死。碧血滿

地嗟誰藏賀蘭不斬上方劍英雄有恨何時忘千年
海上見同廟古苔叢木秋風荒摩挲畫壁塵網裏勇
氣燁燁虬鬚張巫歌大招客酌酒忠魂或能來故鄉

登陽山絕頂

我登此山顛不知此山高但覺群山總在下坐撫其
頂同兒曹又見太湖動我前洶湧三十萬頃烟波濤
長風吹人度層嶂不用仙翁赤城杖峯迴秋礙海鷗
飛日出夜聽天鷄唱中有一泉長不枯乃是蜿蜒神
物之所都老藤陰森洞府黑樹上不敢留棲鳥常年
禱雨車來此投金符靈旗風轉白日晦馬鬣一滴霑

三吳巖巒蒼蒼境多異樵子尋常不曾至探幽歷險
未得歸忽聽鍾來澗西寺此時望青冥脫畧塵世情
白雲冉冉足下起如欲載我昇天行古來名賢捨何
有只有此山長不朽欲呼明月海上來照我長生一
瓢酒浮丘醉枕肱洪崖笑開口秋風吹落浩歌聲地
上行人盡回首

吳中逢王才隨朝京使赴燕南歸

江南草長蝴蝶飛白馬新自燕山歸燕山歸不堪說
易水寒風薊門雪朝邸空隨使者車禁闈不受書生
謁一杯勸君歌莫哀歸時應過黃金臺君不見荒基

秋來土花紫，伯圖已歇。昭王死，千載無人延國士。

鶴媒歌

鶴媒獨步荒陂水，仰望雲間飛不起。遠看過鳥下南汀，鼓翼相迎似相喜。共爲羽族生水鄉，暫從飲啄無猜防。草盾俄開內潛弩，弋師謹笑媒矜舞。嗟爾高潔非凡禽，胡爲狗食移此心。受人馴養忘遠舉，好陷同類機腸深。嗚呼！世間幾人號君子，得利相傾亦如此。

石崇墓

蚪須欲怒珊瑚折，步障圍春錦雲熱。真珠換妾勝驚鴻，笑踏香塵如踏空。酒闌金谷鶯花醉，家逐樓前舞。

裙墜財多買得東市愁，羅綺散盡餘荒丘。猶憐白首同歸者，坐伴遊菟楓樹下。

秋江曲送顧使君

秋江月滿秋潮大，江上行人待潮過。別離休說渡江難，半日順風船穩坐。楚江茫茫葭菼平，使君來時雉鳴。子弟從軍隔江去，幾家猶住夕陽城。水田雖荒飯常足，芡米夜舂三十斛。誰道繁華不及前，戶無征稅官無獄。渡江渡江君莫留，江北樂似江南秋。

登金陵雨花臺望大江

大江來從萬山中，山勢盡與江流東。鍾山如龍獨西

上。欲破巨浪乘長風。江山相擁不相讓。形勢爭誇天下壯。秦皇空此瘞黃金。佳氣葱葱至今王。我懷鬱塞何由開。酒酣走上城南臺。坐覺蒼茫萬古意。遠自荒烟落日之中來。石頭城下濤聲怒。武騎千群誰敢渡。黃旗入洛竟何祥。鐵鎖橫江未為固。前三國後六朝。草生宮闕何蕭蕭。英雄乘時務割據。幾度戰血流寒潮。我生幸逢聖人起。南國禍亂初平事。休息從今四海永為家。不用長江限南北。

古意

孫贇

山礫花落春風起。吹妾芳情渡江水。夢中胡蝶相交

飛門外鵲聲郎馬歸

閨中聞子規

交疏日射房櫳曉。碧樹初聞子規鳥。驚回殘夢了無歡。慘切清愁破清悄。獨宿何曾下綉帷。寧勞勸我不如歸。鶯花爛熳江南道。好向遊人醉處啼。

驪山老妓行

秋風楊柳凋金縷。冷露芙蓉落芳渚。寒香晚色何所如。驪山唐姬教坊女。蛾眉澹掃山遠碧。蟬鬢半拋雲亂吐。時粧無復新妖嬈。曩態猶存舊嬌嫵。我昨咸陽縱冶遊。冶遊爛熳遍西州。青山直抵雙龍關。綠水橫

過五鳳樓。南國佳人金錯落。長安公子玉驂騮。銀壺
送酒青絲絡。皓齒當筵白雪謳。琵琶橫笛空聒耳。唐
姬搗箏妙無比。請彈一曲久含羞。呼喚百迴方強起。
移柱相參鴈成列。調絃未就人先喜。俛首斜拖珠步
搖。向人高露春纖指。樓高韻發響冷冷。急管悲歌一
霎停。初聽乍如風雨至。再彈還作鳳凰鳴。清如玉女
鈞天奏。壯似雕戈出塞聲。澗水帶冰時哽咽。春雷震
石忽憑陵。憑陵未已旋清悄。清悄漸凝聲漸小。四座
無言俱寂寥。餘音已斷猶縈繞。溶溶宛宛復悠悠。切
切淒淒還窈窕。深閨斷蚓怨寒宵。淺谷嬌鶯破春曉。

纏絲萬恨與千愁。婉意柔情不肯休。蔡琰胡笳悲紫
塞。斑姬團扇掩清秋。樓前皓月明如練。天外行雲凝
不流。促拍未終南內曲。新腔忽過小梁州。梁州一摺
月向午。唐姬此時心獨苦。銀甲悲深不忍彈。衷腸斷
盡無由語。低籠翠袖搵香泪。翻使歡娛變淒楚。訴盡
平生富與貧。可憐人世今成古。憶昔開元正太平。兒
家生長在天京。十三學舞曾驚座。十四搗箏能擅名。
玉貌羞花長窈窕。宮腰怯柳更輕盈。春寒不離鴛鴦
枕。日晏方開孔雀屏。五陵年少秦川客。爭愛兒家好
顏色。帶雨尤雲最惱公。追歡買笑寧論直。聲名每出

流輩上風致獨覺傍人惜。承恩况得登掖庭。宛轉隨
龍侍君側。海晏河清久息兵。四夷賓貢盡充庭。炎方
已見來丹荔。交趾還聞進雪鸚。耀日香車連紫陌。飛
雲畫棟列朱甍。空濛一片笙歌海。浩蕩三春錦繡城。
驪山山上多樓閣。萬戶千門通碧落。大駕深居在九
重。四時多暇惟行樂。已營連昌勝結綺。復起芳鳳齊
花萼。壺飛玉女遞更籌。舟戲金龍動鱗角。侍臣傳勅
選嬌容。特許兒家步輦從。宮扇影移花雨外。山呼聲
沸錦雲中。千株火樹爭明月。萬炬金蓮闋彩虹。子夜
歌詞翻白雪。霓裳舞隊散旋風。歌停舞歇徘徊久。銀

箏獨進纖纖手。明眸麗質一當前。含顰美人俱在後。
數聲清響動絃索。八面涼風生戶牖。艷曲新裁萼綠
華。中官催賜葡萄酒。年年秋月復春花。多在宮中少
在家。嬌笑不愁宮監怒。艷粧長得阿姨誇。朝遊複道
瞻天表。夜步西廂拜月牙。閨草經春陪虢國。藏闈竟
夕伴昭華。韶光忽逐流年轉。野鹿啣花上林苑。銜騎
東來鳳闕空。金根西狩蛾眉遠。上方無復聽宣召。新
籍寧辭避差遣。約臂金環兩雪寬。凌波錦襪風埃蹇。
星移物換得無情。復向驪山悄地行。紫禁無人芳草
合。瑤階雨過綠苔生。歌臺索莫花千樹。舞榭蒼涼月

半橋繡閣秋陰連。瑣闥銅仙清淚落。金莖高梧墮翠
蓮。飄玉太乙鈎。陳看不足。百子樓寒霧影昏。長生殿
古煙光綠。宮墻瓦落見蓬蒿。輦路塵生走麋鹿。舞馬
雕牀惱夢思。花奴羯鼓驚心目。故宅新人作宴遊。內
家紅錦別纏頭。珠簾綉柱俄成夢。鳳管龍笙總是愁。
舊曲聞來眉自斂。盛年說着口應羞。飛蓬短髮難禁
白。老屋疎茅不柰秋。舞衫長借鄰人着。同伴相呼只
推卻。臉玉香隨翠靨消。淚珠暗逐燈花落。憂來倒插
黃金鳳。夢裏時彈白翎雀。百感中來不自由。芳心一
片從誰托。唐姬言語一何長。句句淒其字字傷。滿座

聞之聲唧唧。沾巾我亦爲浪浪。滄桑轉瞬誰能識。富
貴浮雲安可常。覽鏡每聞悲素髮。舉杯長欲勸流光。
唐姬亦莫懷抱惡。自古佳人多命薄。傾城西子逐鴟
夷。絕代明妃嫁沙漠。尊前有酒且懽笑。身外閑愁付
冥漠。皎月秋來幾度圓。穠花春盡從渠落。唐姬攬涕
復陳情。請作驪山老妓行。桃李風前霜月下。長吟亦
足慰平生。不因水上琵琶語。那識江州司馬名。爲爾
臨風歌一曲。百年哀怨起箏箏。

梁父吟

江水何深深。深青楓映雲林。衡門一盃酒。抱膝梁父吟。

君不見夷吾奮袂投南冠故人薦引登君門揚眉吐
論下荆楚糾合冠裳朝至尊又不見樂生徒步從西
來燕平一擁帚調笑黃金臺轅門一日見旌節七十
齊城生暮埃古來英俊人所遇皆有立袖拂驪龍珠
能令鬼神泣而我獨何爲幽泉凍蛟蟄荒蘿繞屋秋
雨涼山鬼吹燈冷光濕幾欲乘風朝太清芙蓉縹緲
白玉京天田角井散煙霧阿香布鼓瑯瑤鳴星辰可
望不可即手把琅玕空復情爲臣自古良獨難我更
懷之摧肺肝田疆古冶三猛士昔者虎視青齊間悞
罹相國二桃計恨血今爲春草斑白頭勳舊且如此

何況新知而覲顏梁父吟聲正苦日落未落天星黃
西園灌木秋楚楚青青千里草如霧兀兀當塗高踞
虎長陵百尺空嵯峨夜半山精泣風雨世無女媧五
色石天柱欲倩誰人補荊州水碧岷峨青思美王孫
渺何許梁父吟聲苦傷歌闌玉壺缺白髮千丈長起
坐擊長劍仰天悲流光西歸白日爲誰脫東流之水
何泱泱青冥黃鵠儻垂翅我亦凌風隨爾翔

南園歌贈王給事彥舉

昔在越江曲南園敞抗風軒群英結詩社盡是詞林
仙南園二月千花明當門綠柳啼春鶯群英組絡照

江水與予共結滄洲盟滄洲之盟誰敢雄王郎獨有
謫仙風狂歌放浪玉壺缺劇飲淋漓宮錦紅青山日
落情未已王郎拂袖花前起歡呼小玉彈鳴箏醉倚
庭梧按宮徵哀絃冷冷樂未終忽看華月出天東栽
詩復作夜游曲銀燭飛光白似虹當時意氣凌寰宇
湖海詩聲萬人許酒徒散落黃金空獨卧茅簷夜深
雨分飛幾載遠離群歸來城市還相親閑來重訪舊
遊處蒼烟萬頃波粼粼波粼粼日將夕西風一葉凌
虛舟猶可題詩寄青壁

羅浮歌寄洛陽李長史仲脩

亭亭西樵峯死在南海湄日華麗仙掌影漾金銀池
我昔扁舟恣長往凌風浩蕩烟霞想尋幽更欲探神
竒復向羅浮事仙賞仙家三十六洞天羅浮實與滄
洲連丹霞射影四山靜群真環珮來翩翩藥珠之峯
數千丈君時與我緣蘿上水簾直下飛晴虹萬壑天
風度流響山中劉郎司玉臺仙書授我琅函開心如
明月炯虛照身與浮雲同去來此時會合那能再塵
土分飛忽三載我行奏賦登金門君亦乘輶渡淮海
淮海迢迢烟樹深相思歲晚結愁心長風萬里碧雲
遠何由一寄還山吟山中洞房春寂寂山中之人長

嘆息松花酒熟人不歸
瑤草春風幾回碧

長歌行

彈鳴絃發清商悲吹激林木
歌聲一何長歌聲長絃
聲緩百年鼎鼎不易滿

短歌行

擊長劍和短歌短歌聲無歡
調促情苦多時流光疾
逝波青銅霜飛柰老何

休洗紅

休洗紅洗紅顏色落莫思君
思君懷抱惡君恩原不
淺妾命由來薄君如白日
不回光妾有芳情向誰托

休洗紅洗紅休莫莫

紫騮馬

紫騮馬黃金羈兒家夫婿金陵兒
金陵正直繁華時
日與遊俠相追隨追隨遊俠金陵下
長跨金羈紫騮馬
賭勝初登蹴鞠場縱酒還來聞鷄社
越羅楚練照晴空飛鞚揚鞭去
似龍卻轉端門回輦路斜穿夾道
過行宮行宮夾道通三市
長使傍人誇意氣紫陌春
融錦繡連青樓日暮簫笙起
青樓娼女研羅裙清歌
宛轉駐流雲歌闌陌上春風度
舞罷樓前壁月新陌
上樓前相識多相陪相引屢經過
房櫳寂寞交疏裏

雲鬢粧成奈爾何

白紵四時詞四首

姑蘇臺上春風和，江花亂落江水波。交疏楊柳綠參差，華筵夜列開綺羅。當筵西施問群娥，朱顏爲君起微酡。自拈紅牙節清歌，飛花著人思繁多。華月耿耿度斜河，疎星出河夜欲過。烏啼啞啞奈爾何。

閨門輦路薰風時，江光瀲灩芙蓉披。翠羽霓旌照洲渚，鑿輿出遊初避暑。西施含顰嬌不語，群娥闐起歌白紵。回風舞袖爲君舉，歌聲窈窕一何長。白紵之白百如霜，木瓜花紅荔子香。東江月出西江光，銀壺酒

多樂未央

館娃宮畔風蕭蕭，芙蓉墮香楊柳凋。銀河影澹烏鵲橋，熒熒雙星麗碧霄。笑人微醉臉紅潮，筵前舉袖催玉簫。舉歌白紵闐妖嬈，越羅楚練風飄飄。此時奉君情欲絕，銅龍夜深宮水咽。銀牀低轉梧桐月。

北風吹江日宛宛，江天飛雪簾櫳滿。美人臺上鬪腰肢，羽觴流霞照華瑄。筵前西施含醉時，歌停綠水聲欲緩。群娥玉環低款款，別宿臺前水仙館。芙蓉帳高錦雲煖，儂覺寒宵作那短。

將進酒

青瑤案上離鸞琴。一徽已直千黃金。開樽花下對明月。欲彈一曲還沉吟。沉吟沉沉幾低首。彈商聲。勸君酒。雍門風樹春蕭蕭。地下田文骨應朽。

阿嬌怨

妾昔初入昭陽時。橫雲學得內家眉。風鬟霧鬢在君側。長得君王不自持。侍宴前楹春爛熳。承權別殿夜逶迤。西涼絃索龍香撥。北苑蒲萄金屈卮。一從寵薄恩光歇。長門永巷宣呼絕。斗帳香銷葦蕤垂。舞裙寬褪丁香結。熏籠夕倚瑣窗雨。羅襪秋寒玉階月。淒迷夢醒心似灰。零亂憂來涕如雪。橫塘浦口大江邊。女伴年年憶采蓮。雙飛翡翠渾如畫。並蒂芙蓉只似仙。旁舍誰吟白華曲。下堂長咏綠衣篇。君恩若許重相惜。缺月清光應再圓。

蔣陵兒

蔣陵健兒身手捷。青年好遊仍好俠。錦衣繡帽綵絲囊。綠髮葱籠映朱頰。春風二月蔣陵西。柳暗秦淮花滿堤。窈窕金鞍搖日出。輕盈紫燕躡花嘶。佳人紈扇和詩贈。上客金瓶帶酒携。上客留連正及時。佳人妙舞闌腰肢。舞回璧月當空見。歌罷楊花似雪飛。揚花似雪紛紛落。酣醉人前跨浪譚。自然不分揖金張。况

肯低頭拜衛霍意氣由來凌七貴豪華豈必資三畧
五侯宅裏聽啼鶯廷尉門前彈羅雀揚雄寂寞掩柴
扉草得玄成髮若絲歲歲年年書閣底惟應羨殺蔣
陵兒

次武昌

大風吹船如馬走船頭水聲作牛吼挂帆初發岳陽
磯轉舵俄灣武昌口武昌城頭黃鶴樓飛簷遠映鸚
鵡洲漢陽樹白煙景濕行人如鶴沙際立江南風土
寒氣遲居人九月著紵衣酒旗臨江開竹屋當壚小
姬能楚曲蜻蜓船尾旋回風今夕停船酒家宿

送何三元帥北上

春風吹花江水波江頭楊柳綠差差臨期送別增慊
慨我與何郎情最多何郎昔年十六七明珠虎符光
照室錦臂蒼鷹掣暮雲青絲白馬嘶晴日此時我作
座上賓星樓月帳長相親班超英傑耻投筆孫楚兀
傲猶參軍何郎嚴親初入覲何郎笑解封侯印鵲血
弓鞘滿壁懸青門瓜地從人問今年會晤蔣陵西爛
熳鶯花醉欲迷梧桐葉落鳳臺曲楊柳煙籠白下堤
何郎於我情最厚此別寧堪酌春酒平原北上路迢
迢白鴈南還寄音否

捕魚圖

小孤洲前春水綠。泛湖小船如小屋。白頭漁父不解
愁。往來捕魚湖水頭。得魚換米納官稅。妻拏衣食長
優游。大兒十三學網罟。小女七歲能搖撈。江口賽神
夜吹角。村邊賣魚朝打鼓。雨來維稍依古岸。風起鳴
榔入長浦。荻芽短短桃花飛。鱖魚上水鮪魚肥。鱸魚
燒筍醉明月。蠻歌唱和聲。咿咿月明在天光。在水但
願年年只如此。無風無浪安穩眠。湖中有魚漁得錢。

秋江曲

唐肅

妾家住銀塘。石楠秋葉香。憶君蕩槳去。江水與愁長。

西風夜泣蒹花露。鴨鵝岸低人不度。冷莎如箴刺烟
素。鴛鴦飛來鷓鴣去。

過漂母墓

昨日下午淮河船。河流衮衮不見天。逆風一日行十里。
黃牛黑驢牽不前。今日過韓信城。城邊草荒田不畊。
人傳韓信此發跡。至今城留韓信名。當時乞食向漂
母。母哀王孫心獨苦。一朝富貴報千金。不記淮陰少
年悔。我來不弔韓將軍。悲歌獨弔漂母墓。英雄貧賤
少知己。不在男兒在女子。

江南曲

袁凱

江南好流水中有鯉魚與鴈鳧
我堂上姑姑今年老嗚聲嗚嗚
良可哀生而不能養死當何時
回死而不回嗚嗚良可哀

楊白花

楊○白○花○飛○入○深○宮○裏○
死○轉○房○龍○間○誰○能○復○
禁○爾○胡○為○高○飛○渡○江○
水○江○水○在○天○涯○楊○花○
去○不○歸○安○得○楊○花○作○
楊○柳○種○何○深○宮○飛○不○去○

徐子脩畫山水歌

夏家高堂生書寒徐卿畫圖墨未乾
深山大澤貯烟霧黑處似有龍蛇蟠
襄陽小米師董源妙處不受繩

墨牽頃刻萬里凌風烟房山尚書世稱賢
化為白雲滿晴巔李家將軍極清妍
畏避退縮不敢前至今海內人爭傳
惟卿得此二家意損益往往無凝滯
心思元居造化先筆力正在蒼茫際
前年為吾寫林麓百道飛泉出幽谷
老夫醉來不敢眠深慮波濤捲茅屋
荒堤曲阪路如線遠入深林隱隱見
水上人家不閉門門外幽花滿芳甸
徐卿徐卿我所慕廿載相看髮垂素
安得吳淞千尺水更畫城東種瓜處

休採花

楊基

休採花採花蝴蝶飛休撲蝶撲蝶傷花
枝花枝始始

戲雙蝶臨風對花不忍折平生愛蝶仍愛花只恐傷
花復驚蝶君似蝶妾似花花開能幾日胡蝶過西家

雪中登黃鶴樓

黃鶴樓前水平岸春雪當空舞撩亂東風知我欲登
樓助以瓊瑤作奇觀昔人黃鶴去不回我驅白鳳橫
江來遙看歷歷漢陽樹一色盡是梨花開人間何處
最佳絕百尺闌干滿江雪氣壓滕王閣下雲興高度
亮樓中月羸洲咫尺非難到鶴背綺花落在烏帽載酒
誰能問謫仙題詩未必無崔顥江山得此清無敵頃
刻銀蟾湯瑤碧更着仙人紫綺裘卧聽呂巖吹鐵笛

雪中再登黃鶴樓

平生不願萬戶侯亦不願識韓荆州但願武昌連日
雪日日醉登黃鶴樓樓前絕景冠今古况有繽紛雪
花舞玉樹參差認漢陽銀洲浩蕩迷鸚鵡江頭兒女
走欲顛謂我自是騎鶴仙白雲飛盡黃鶴去此景不
見三千年我拍闌干爲招手世上神仙果何有桃李
非無頃刻花江湖亦是逡巡酒他日重來五百春樓
前花草一番新相逢不識純陽子何用重尋回道人

贈錢塘全王孫

兄爲柱國弟開府門吏紛紛皆繡斧勅賜龍河百畝

宮畫戟彤弓映朱戶。金鳳盤胸白錦襦。面如紅玉紫
虬鬚。六宮曉逐諸王入。八府春隨宰相趨。東風忽念
江南好。寶髻看花踏春草。茂苑鶯聲醉裏聽。建章柳
色愁中老。回首瀛洲草木新。蒼顏白髮照烏巾。都將
秋水蛟龍劍。贈與長安任俠人。

李嵩畫宋宮觀潮圖

十五潮上月。十八月上潮。君王連日醉。伐鼓更吹簫。
簫聲忽如天上落。大內臨江起飛閣。碧瓦朱甍十二
闌。嬪娥歲歲觀潮落。湖水猶可定。日夕來朝宗。人心
獨不如。而不思兩宮。兩宮未雪耻。屢下班師旨。素車

白馬神。云是鴟夷子。何不令天吳。折食大奸髓。奸髓
不可食。國耻不可滌。嗟爾江上潮。雖雄竟何益。潮無
益於人。看潮徒損神。橫江鐵騎來。三日飛埃塵。曆數
固有歸。爾潮胡不仁。遂令鸞鳳雛。戚戚悲殘春。春光
浩無主。落花隨暮雨。回首幾秋風。旌旗又如許。又如
許。君勿悲。古來在德不在險。一杯之潮安足奇。

挂劍臺和黃子邕

生諾諾尚淺死諾諾更深。當時季子意即是徐君心。
嗟嗟徐君骨已朽。寶劍摩挲在吾手。正擬臨岐解贈
君不意。挂君墳上柳。挂劍果何益。聊以明不欺。當時

讓國心肯使徐君疑於乎劍可折臺可隳死生之諾
不可虧

醉樵歌

張仲簡

東吳市中逢醉樵鐵冠欹側髮飄蕭兩肩矻矻何所
負青松一枝懸酒瓢自言華蓋峯頭住足跡踏遍人
間路學書學劍總不成惟有飲酒得真趣管樂本是
王霸才松喬自有烟霞具手持崑崗白玉斧曾向月
裏砍桂樹月裡仙人不我嗔特令下飲洞庭春興來
一吸海水盡却把珊瑚樵作薪醒時邂逅逢玉質石
上看棊黃鵠立斧柯爛盡不成仙不如一醉三千日

于今老去名空在處處題詩償酒債淋漓醉墨落人
間夜夜風雷起光恠

秋夜吟

詹天臞

桂樹叢叢月如霧山中故人讀書處白露濕衣不可
去

清江曲

清江水清峽水黃清江之上多綠楊浣花女兒立沙
際青裙白足如秋霜蜀山雪消十日雨一夜扁舟欲
齊樹兩岸猿聲不肯休送君流過峽州去

豫讓橋

張孟兼

明音類選
卷四
豫讓橋邊楊柳樹。春至年年青一度。行人但見柳青
青。不問當時豫讓名。斯人已往。竟千載遺事不隨塵。
世改斷碑零落野苔深。誰識孤臣不二心。豫讓橋路
千里橋下滔滔東逝水。君看世上二心人。過此多應
羞愧死。

梧桐樹

錢宰

梧桐樹。一葉墮。秋風一葉委。秋露明年二月新葉生。
還在今年葉飛處。漢宮飛燕近。承恩零落班姬不如
故君不見梧桐樹。

明音類選卷之四



